

Ո Ր Ո Շ ՈՒ Մ N 637

/մաքսային կանոնների խախտման վերաբերյալ

վարույթ սկսելը մերժելու մասին/

«29» սեպտեմբերի 2023թ.

ք. Սիսիան

Ես՝ Հայաստանի Հանրապետության պետական եկամուտների կոմիտեի Հարավային մաքսատուն-վարչության պետ Արտաշես Ղամբարյանս, քննելով Վրաստանի քաղաքացի Զազա Կոբերիձեի (անձնագիր՝ 20AA08777) կողմից մաքսային կանոնների խախտում կատարելու վերաբերյալ նյութերը,

Պ Ա Ր Զ Ե Ց Ի

Վրաստանի քաղաքացի Զազա Կոբերիձեի կողմից 05.09.2023 թվականին Մեղրիի մաքսային կետ-բաժնով թիվ 05100041/050923/0000856978/00 մաքսային մուտքի օրդերով ՀՀ է ներմուծվել MERCEDES-BENZ - GLS500 մակնիշի, 2016 թվականի արտադրության, WDC1668731A722703 նույնականացման համարով, GG633GF պետհամարանիշով տրանսպորտային միջոցը: Ժամանակավոր ներմուծման վերջնաժամկետ է սահմանվել 14.09.2023 թվականը, սակայն մինչ այդ ժամկետի ավարտը վերոնշյալ տրանսպորտային միջոցը չի արտահանվել ՀՀ տարածքից, որի արդյունքում խախտվել է հետադարձ արտահանման պարտավորությունը:

29.09.2023 թվականին իրավախախտման առկայությունը կամ բացակայությունը պարզելու նպատակով, սահմանահատումների վերաբերյալ հարցում է կատարվել ՀՀ ՊԵԿ Ներքին անվտանգության վարչությանը:

Ի պատասխան հարցման՝ ՀՀ ՊԵԿ Ներքին անվտանգության վարչությունը տրամադրել է սահմանահատումների պատմությունը, համաձայն որի Վրաստանի քաղաքացի Դավիթ Ֆոչխուան 05.09.2023 թվականին ժամը 20:48-ին Բագրատաշեն պետական սահմանի անցման կետով MERCEDES-BENZ - GLS500 մակնիշի, 2016 թվականի արտադրության, WDC1668731A722703 նույնականացման համարով, GG633GF պետհամարանիշի տրանսպորտային միջոցով անցել է Վրաստան:

ԵՏՄ մաքսային օրենսգրքի 264-րդ հոդվածի 8-րդ մասի 3-րդ կետով սահմանվում է, որ՝ «Առանց մաքսային մարմնի թույլտվության և առանց մաքսային հայտարարագրի թույլատրվում

է հայտարարատուի կողմից, ի թիվս անձնական օգտագործման այլ տրանսպորտային միջոցների, օտարերկրյա ֆիզիկական անձի կողմից ժամանակավոր ներմուծված անձնական օգտագործման տրանսպորտային միջոցը փոխանցել օտարերկրյա այլ ֆիզիկական անձանց»:

«Մաքսային կարգավորման մասին» ՀՀ օրենքի 301-րդ հոդվածի 1-ին մասի համաձայն՝ «Մաքսային կանոնների խախտում է համարվում անձի կատարած անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության պետական սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենքով նախատեսված է պատասխանատվություն: Նույն հոդվածի 2-րդ մասի համաձայն՝ ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության»:

Նույն օրենքի 309-րդ հոդվածի 1-ին մասի համաձայն՝ «Ֆիզիկական անձանց կողմից հետագա արտահանման պարտավորությամբ Հայաստանի Հանրապետություն ներմուծված անձնական օգտագործման տրանսպորտային միջոցները սահմանված ժամկետում Հայաստանի Հանրապետությունից չարտահանելը, եթե հետագա արտահանման պարտավորությունը խախտվել է ավելի քան տասն օրով՝ առաջացնում է տուգանք՝ ֆիզիկական անձանց կողմից այդ տրանսպորտային միջոցներն ազատ շրջանառության համար բաց թողնելու նպատակով ներմուծելու համար նախատեսված **մաքսային վճարների** (բացառությամբ մաքսային մարմինների կողմից մաքսային գործառնությունների իրականացման համար գանձվող պետական տուրքի) **մեծության տասը տոկոսի չափով, բայց ոչ պակաս, քան երեսուն հազար դրամի չափով**»:

Նույն օրենքի 332-րդ հոդվածի համաձայն՝ «Մաքսային կանոնների խախտումների վերաբերյալ գործը քննվում է պատասխանատվության ենթարկվող անձի մասնակցությամբ կամ Վարչական իրավախախտումների վերաբերյալ Հայաստանի Հանրապետության օրենսգրքի 267-րդ հոդվածով սահմանված դեպքերում՝ տվյալ անձի բացակայությամբ:

Մաքսային կանոնների խախտումների վերաբերյալ գործը կարող է քննվել սույն հոդվածի 1-ին մասում նշված անձի բացակայության դեպքում, եթե անձը բացակայում է, և

հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության պետական սահմաններից դուրս»:

«Մաքսային կարգավորման մասին» ՀՀ օրենքի 324-րդ հոդվածի 1-ին մասի 2-րդ կետի համաձայն՝ մաքսային կանոնների խախտման մասին հաղորդումն ստանալուց հետո՝ եռօրյա ժամկետում, մաքսային մարմնի կողմից իրականացվում է օրենքում նշված գործողություններից որևէ մեկը՝ կայացվում է գործի վարույթ սկսելը մերժելու մասին որոշում՝ վարույթը բացառող հանգամանքների առկայության դեպքում:

Այսպիսով, վարչական մարմինը, քննելով գործում առկա ապացույցները, գտնում է, որ չնայած նշված տրանսպորտային միջոցի հետագա արտահանման պարտավորությունը Վրաստանի քաղաքացի Զազա Կոբերիձեի կողմից չի կատարվել է, սակայն այն կատարվել է այլ անձի կողմից և սահմանված ժամկետում, հետևաբար քաղաքացի Զազա Կոբերիձեի արարքում «Մաքսային կարգավորման մասին» ՀՀ օրենքի 309-րդ հոդվածով նախատեսված մաքսային կանոնների խախտման հատկանիշներ առկա չեն:

Հիմք ընդունելով վերոգրյալը և ղեկավարվելով «Մաքսային կարգավորման մասին» ՀՀ օրենքի 324-րդ հոդվածի 1-ին մասի 2-րդ կետով՝

Ո Ր Ո Շ Ե Ց Ի

1. Վրաստանի քաղաքացի Զազա Կոբերիձեի նկատմամբ մաքսային կանոնների խախտման վերաբերյալ գործի վարույթ սկսելը մերժել:
2. Որոշման մասին հայտնել քաղաքացի Զազա Կոբերիձեին:
3. Պարզաբանել, որ «Մաքսային կարգավորման մասին» ՀՀ օրենքի 334-րդ հոդվածի 2-րդ մասի համաձայն որոշումն ուժի մեջ է մտնում այն կայացնելու պահից:

ՀԱՐԱՎԱՅԻՆ ՄԱՔՍԱՏՈՒՆ-ՎԱՐՉՈՒԹՅԱՆ ՊԵՏ
ՄԾ ԳՆԴԱՊԵՏ

ԱՐՏԱՇԵՍ ՂԱՄԲԱՐՅԱՆ